

求恕齋
叢書

雪橋詩話三集

十

雪橋詩話三集卷第十

遼陽楊鍾義撰集

吳興劉承幹參校

懷寧潘瑛蘭如出姚惜抱門下有晉希堂集嘉慶乙丑
成國朝詩萃初二集意在上繼別裁錄皖人之詩爲獨
多中如懷寧蔣瑤芝老客過棲霞寺云江雲沈佛火石
氣冷秋花臨賀春郊云水氣黑浮瘴山根青到城與秦
僧夜話云眉閒殺氣驚秦語窗外秋濤作戰聲哭方素
伯云卜地有緣歸父骨著書無夢到侯門桐城劉琢魯
堂池陽云鴨頭新漲湖三尺一夜東風上鯢魚全椒王

肇奎鶴嶼秋夜云殘月不知夜寒蟲各爲秋青陽陳其
名子聞席上贈陳參戎云酒酣痛說金川事自解團花
數箭癡休寢陳浦約寧古鏡云可知不但天邊月曾照
當時歌舞人潛山丁鵬年風翻月夕云如何夢亦相逢
少怕我傷心不肯來涇縣吳葆蓀竹坪邯鄲早發云敗
槽馬齧江聲大又是鐙殘夢醒時評纂亦尙有法其錄
惜抱詠古云秦皇服胡越六合歸懸衡雄心中可繼乃
築女懷清漢廷策賢良褒然儒董生慷慨公儀子食祿
復何營如何桑與孔賈豎充簪纓富民封丞相他日悔
心萌已衰不再盛痛惜此孤惇鼓枻出大江迴首樅陽

渡中有漢帝臺言是射蛟處日夕天風吹青條變枯樹
上有黃鳥吟下有寒兔顧憶昔翠華游帆檣隔雲霧中
流造新歌清音發眾婢巡游旣已疲神仙不可遇爲念
祈招詩廣心焉所務循吏有倪寬乃以負租黜設吏爲
繭絲何以責乾沒念彼魏二臣屬厭風饋畢豈不愛吾
君懼以滋遺失高亭發秋吹廣野多邊聲誰和羌笛歌
難爲愁士聽昔應縣官募希有絕幕名奮隨兩校尉西
詣車師城夷虜眾且桀漢帳懸孤旌創夷更登陴回首
涕縱橫累月鬻弩鎧拔絕城遂傾將軍旣効命舊卒皆
凋零歸來家室盡門巷荆棘平昨聞漢天子已拔單于

庭微功不得錄委棄秋草并蘭如久列門牆稱其發爲
詠歌懷抱獨遠故是知言至和璧非珠翠流光悅婦人
一首尤惜抱言志之作也

南薰殿舊藏古帝王聖賢圖像附以內務府廣儲司茶
庫收貯歷代功臣各像凡冊卷軸一百二十有二爲像
大小五百八十有二乾隆戊辰詔重裝池櫝以香楠爰
以文緞帝后像黃表朱裏功臣像朱表青裏每歲夏月
抖曬嘉慶乙亥命纂入石渠仁和胡以莊一手參攷成
南薰殿圖像攷一卷元代服制自中葉以後朝祭參用
唐宋制度而舊俗要未嘗廢圖中鈇笠罽姑猶存本色

按圖覈實可以補史闕文 純廟時兩次纂輯歷朝名
畫均以院畫附後至是詔輯三編一如往例因仿樊榭
南宋院畫錄成國朝院畫錄二卷其丙子恭和御製重
華宮茶宴聯句元韻云縹緗美萃晉唐前珠玉千番續
舊編垂露懸鍼書造古模山範水筆餘妍品題不爽邀
眞鑒制作長新握化權冊卷軸看重纂輯聞韶丹陛錫
華筵珠採隨和玉採璠古今名蹟富收存因文見道昭
宸訓正筆由心仰聖言始信儲藏宏策府又看聞見廣
詞園昇平盛事芳華節喜起虞歌協泰元以莊爲煦齋
門人詩文甚富此二書及西清劄記足資談往其定鄉

鄉襍著則家祠祭田之所在也

張少南先生定鄉
雜詠補所未備

永樂大典杭字韻下正書洪武杭州府志以乾道淳祐
咸淳三臨安志分注其下缺碑刻一門胡以莊嘗從大
典錄出施鶚淳祐志殘本釐爲十六卷於寺觀獨詳汪
小米從吳門汪氏假得宋槧本咸淳志精良完整資以
校栞表中賈相與度宗一例跳行小米以係影宋本姑
仍之栞成招客以莊賦詩有云師相列銜懲謬妄宗藩
追諱費參尋南宋避嫌名甚繁又孝理度三宗均以宗
藩繼統至所諱有無可考者收當代藝文頗傷繁衍近
人輯郡縣志多載同時篇什此其濫觴說友降元至正

十四年二月爲福州宣慰使三月爲李雄所殺以莊詩
論人誅莫逃嚴筆閤世搜還比吉金蓋多借悅生堂書
也研北雜志謂翰林國史院有世祖時所賜賈似道沒
官書數千卷金石刻多宋渡江以前拓本

四明童萼君先生

槐

薇研宗伯師

華

尊人也阮文達撫

浙嘗引居幕府肄業成均時爲法梧門所知有今白華
堂詩錄八卷癸酉之變賊新樂府四首皆紀實語其讀
漢書偶感云牢邪石邪五鹿客邪武庫尙方殫賜物邪
安昌紅休儼爲國邪鹿久徙菟何牢石邪有自踵增其
流極邪莽是之資漢以覆邪平陵東松柏桐門生來哀

義公莽舌斷新室覆誰能旌義公所冀在赤伏休休休
不念翟義公翻爵不義侯二百年後山陽貶孰仗大義
扶神州義極正大先生字樹眉別號晉珊嘉慶乙丑闈
中恩雨臺得胡以莊卷疑爲先生朱南厓曰果爾乃名
會元也遂定榜首先生亦以是年成進士榜後 仁宗
問大興以新貢士孰爲最大興舉徐頴直卿及先生以
對廷試交卷過遲以部屬用自雍正八年設立軍機處
以來章京或特簡或薦引無定制是年十月始命內閣
六部保送數十員由軍機大臣擬詔冊章奏等題試之
本處堂上公同閱卷排列名次進呈欽定後帶領引見

奉旨記名者挨次補用試分三日以堂上地祇容二十餘席也題爲勤政殿疏先生有句云所其無逸邇丕丕基於億年萬年彰厥有常思贊襄於一日二日以第一名卽予入直例兼方略館職卽日派充纂修嗣後軍機處掄選章京卽照此次辦法著爲令官至通副卒年八十六薇研先生精輿地之學直上書房者二十六年查辦四川事件秉正察微能得其實卒於光緒己丑年七十二

應詔首聞陳正字聽詩坐徧魯諸生潘功甫畱陳範川句也範川與徐星伯皆以翰林改官中書嘉慶中詔編

全唐文範川爲纂修官著有全唐文補遺全唐文紀事
官書旣成私所撰述將進呈而未果道光中掌教粵之
越華書院吳石華曾勉士常與游梁子春侯君謨譚玉
生陳蘭浦與兄子宗元皆在弟子之列築載酒亭環植
花竹招諸名士辨論書史閒述乾嘉時名臣碩儒言行
感憤時事慷慨激烈歿歸嘉興弟子因刻其詩以傳

嘉慶丁丑吳縣許氏石契齋刻其遠祖鑑湖氏高祖介
亭氏詩爲巾箱集鑑湖名察明天啟時東事日棘臺符
並海郡縣皆修城濠鑑湖屬植受功身操丈尺自萬厯
中稅使四出誅求無藝吳民困上供破產不償其避役

有感詩序云甲子之歲苦于賦役兄弟相率遷越有傷
衰老不幸遭此葢天啟四年也當是時政繁賦重吳中
有金花銀銀花布之謠至流宕他縣備極艱辛故其詩
多憂悲愁苦之思介亭名徐紳所居去惠氏東渚故居
僅里許與惠仲孺同補博士弟子員惠天牧序其詩謂
寢處山澤有淖洳冰雪之姿其寄託溫藉自持比之名
香佳茗葢生當康熙承平之世亭障韜戈萬里如衽席
白首耆艾嘯傲湖山禿筆輟耕書葉滿甕以視其先世
築城遷越流離世故者迥不侔矣沈文起爲介亭作傳
謂同時沈宗伯以詩名江左力主盛唐非是則爲外道

其空疏末學剽竊字句敷衍故套如麤行沙門演唱禪
門日誦便夸爲曹溪正宗徐翀出入唐宋諸家故當時
不甚推重雖徇其後人之請語多溢美然介亭之能自
立則可信也

周稚圭與鄭夢白以名士相繼帥桂管釀成髮逆之亂
然其詩筆亦自可觀雨後游浯溪讀唐中興碑用涪翁
韻云巉崖峭立中有溪隔溪已見磨崖碑天公游屐縱
所好冷語不肯吹成絲幽居孤僻稱去聲漫叟舊隱光復
思佳兒次山子友讓有復浯溪舊居詩碑高十丈岵臺西瑰文鐵畫英
靈棲風霜千載字不蝕神之所護非人爲頌辭莊嚴美

盛德豈有罪案歸君師功成尙致紫袍泣事急重賴天
戈揮文人慣喜逞新異時勢那復論安危深文曲詆靈
武業忠愛枉讀春陵詩前賢心事大刺謬此中詎合鐫
其詞掉頭卻尋刺史宅洞潭磴道孤籐隨雲山韶馱渺
何許溪聲凍澀猿吟悲其二云元子以文傳涪溪更乞
魯公書此碑魯公親值范陽亂連城搶攘勢如絲哥舒
老將慙肉眼草間泣拜綳中兒潼關大開突騎西夜烏
從此延秋棲借令天險誓死守豈必國事真難爲不見
河朔廿四郡一旅保障平原師乞書深心公所許事定
嘗惜霜毫揮中興之功繫公力擘窠巨手曾扶危孤忠

慷慨露波磔弈世瞻眺鏘訶詩韓碑書石出誰筆碑仆
僅止存其詞護惜瑰寶屬縣令

同年崔君惲
方宰斯邑

勿任敲搨

常相隨形仙尸解終泯滅握拳透爪餘傷悲

南豐譚古愚少宰尙忠及子光祥君農光祐子受孫祖
同統方錫洪麗原均有集少宰以乾隆辛未進士入居
郎署出履封疆高宗稱爲正人可任事君農太守甲
寅散館上以清語誇好者再且有花尙阿之旨已雙
圈授館職矣旣趨出上顧樞臣曰此譚某子也大可
造就當授以政遂以部屬用散館第一改用部屬前此
所未有也扈從諸臣奉敕書山莊詩許倩人代筆潘文

恭劉青垣皆以君農奏名瀕行有所助召對奏及之
仁宗曰伊父曾爲巡撫乃一寒至此耶出守施南調武
昌卒官子受號鐵簫少能文與兄君農師錢魯斯通六
書韻學兼工騎射善度曲入貲爲通判參勒經略戎幕
擢守邵州能善其官統方道光壬午舉人官淮安山盱
同知以咸豐辛酉殉節於浙江麗原號梅丞乙酉拔貢
早卒與統方及吳子序子顧有南豐四俊之目寄懷龔
定庵云閒可讀書終是福狂何關世忽知名贈黃虎癡
云賣文富贖周鄰粟戀母貧添卻幣書皆雋語也

譚君農謝王相公惠董四畝桃云珍重來宮苑晶盤出

御齋問名絲笑絡

海錄碎事柿子樹接桃枝早熟者謂之絲絡白

嘗味蜜勝崖

香染搓橙手慙深報李懷不圖分玉食消渴到吾儕

東四墓桃產香山東四墓西四墓正當萬壽山後寶藏

庵前皆明代妃嬪葬所也魏默深詩龍髯便是隔山隈

裂帛湖前東四堆何處香魂桃萬樹千年風雨翠華來

東四墓宜桃歲供進御而都人多譌傳爲董氏墓桃又

或云東四畝桃此又作董四畝皆未深考耳

覺羅恪勤公琅玕勦維西獬匪在營染受嘔吐之證嘉

慶九年卒於雲南督署姬人陳氏殉焉譚君農時視滇

學有詩弔之子受太守詩云臣死君妾死主未死之人